

Nzryr-krbz Pol Mz Lr Galesia

Provins

Natq Ngr Nzaplxtqngr Mz

Nzryr-krbz Pol Mz Lr Galesia

Aposol Pol yrbzle letz lc mz kxnzrlxngiting kcnq tzmncng mz provins kc Galesia, kc tqngi kandre kc Trki mzli ka. Yrle mz mzlr yiz 48—58 AD mz nibr nzrmcng m Jiszs.

Pol xlrle kx kzdung lr Jiu kxnzrlxngiting nzalvztr-rbr-ngrdr da mz kxtrngiulrJiu kxnzrlxngiting mrkc. Nzrpilr kx kxtrngiulrJiu napakrng x navz-nqblqlr Lou sc Mosis, murde na-arlapxng. Nzrpi-kzlr kx Pol trngini-angidrleu aposol, x kx tekqtrle Nrpakxmrlz mz nzrkatx-krde kzdung lou kx navz-nqblqlr.

Pol yrle letz lc mz nzaelwapx-krde kx nide aposol angidr, x aposol kztedeng drtwrdr esz'ti badr mz nzalvztr-krde m lrpzki r nzrlapxng. Pi-kzpze badr kx nzvz-nqblq-krdr Lou sc Mosis trkrlzleu nzarlapx-krde nidr, a' nabrti drtwrdr Kraes. Murde mz nzrlr-lzbq-krbzku mz nzvz-nqblq-krgr Mqngrkxtr, trmnclzpepwzkuu mz Lou, a' vz-nqblqpeku da kx pim Mqngrkxtr mz nabzgu.

Ngaldeng kxmyapxbz 2:20-21 x dckrlzde kc 5.

Mrkcng Mz Letz Lc

Nike tqyrngr Pol letz lc. *[1:1-10]*

Nrpakxmrlz kc tqyapwxtipx Pol ngi da angidr murde vzpxm mz Kraes. *[1:11-24]*

Aposol kc-kzng drtwrdr esz'ti badr Pol mz
nzalvztr-krdeng. [2:1-10]

Bzkq atrkatiamu Nrpakxmrlz mz nizrpi-krmu
kx namnclzbzku mz lou murde narlapxku.
[2:11-21]

Twzku nzlungr angidr mz nzabrtr-krbzk
drtwrgu mz Kraes, trngiu mz Lou Sc Mosis.
[3:1-14]

Lou sc Mosis trayrkrpxleu da kc tqesalz-kaingr
Gct. [3:15-22]

Kxnzrlxngiting nzapulr doa kxtpowz neng Gct,
mz nzaxvctr-krbzlr mz Mrlxde, a' nzmnc-lz-
ngrbz mz lou apule nznginingr kxnzawz-
nrbalqng. [3:23—4:31]

Bzkq mnc-lzbzmu mz leplz kcng tzsuti drtwrdr
nzmnc-lz-krbzmu mz lou mz nzrlapxngr.
[5:1-12]

Navz-nqblqku nzymne-krm Mqngrkxtr mz
nabzgu. [5:13-26]

Mz nzvz-nqblq-krgru Mqngrkxtr nawztrpzku
mz leplz. [6:1-18]

¹⁻² Ninge Pol, ryrbo bamu, nimu kcng tznginidr
leplz neng Gct, tzmncng Galesia Provins. Nigr
badr mzlegung kcng tzmncng mrka, rpibzkr
bamu kx, “Nimu la.” Ninge aposol murde Jiszs
Kxnzmcpix nidr mz Gct Trte kc tqatulzml nide
mz nzbzng, nzmcpixlr ninge. Delc zmatq rnge
mz nzac-lve-krnge lrmakxtr trvzpxpuu mz leplz.

³ Krka'-ngrne kx Gct Trtegu x Kxetu rg
Jiszs Kxnzmcpix naokatr-lr nimu mz zmrlz
ngrdr kxmyalz, murde namnc-zpwxamu badr.

⁴ Nzmnc-zpwxngr lc vzpxm mz Kraes, murde
sc tqvz-nqblqpele me pnz drtwr Gct Trte, mz

nzrlrpx-lzbq-krde mz nzbzngr. Alele da lc murde rpile nakapxle alwx rgung, x na-arlapxle nigu mz nrvz-nqblqngr nqm q kr kxdrka'-ngrng kcng tzvz-rbrng mz da kx nzaoti drtwrdr x mz da kx nzaleting. ⁵ Delc takitrde nzglqpx-krgr x nzamatq-krgr Gct Trte, tqvzpe tqvzpe. Eu. Angida!

Gct Arlapxle Lepz Mz Hxl Mz Lrpzki Esz'txu

⁶ Kctitpxxx kx esablqti-anipeamu Gct kc tqaveatile nimu mz nzmncz-zvz-krbzmz mz zmrlz ngr Kraes kc tqmyalz. A' sc tqvz-nqblqamu nzalvztrngr kzble mz lrpzki r nzrlapxngr. ⁷ Kxmule-esz' trpnz-moungr lrpzki r nzrlapxngr, a' kzdung leplz sa tzesabrtlr nimu, mz nzteqtr-krdr Nrpakxmrlz angidr kx Kraes esz'-krde arlapxle nigu. ⁸⁻⁹ Pibzkr bamu da lc mzli kc tqmnc-ngrgu. ✧ X mzli ka sa tqpipe-mopwc' bamu. Takitrde Gct nzadwatr-krde doa mz Hxl, kxmule-esz' kzdq nigr aposol o kzdq enjrl kxvom Heven nzmz kx tqalvztr-ngrde lrpzki r nzrlapxngr kx blepxbz mz da kc tqyapwxtipebzk bamu, tqlxngitipeamu mzli kc.

¹⁰ Tryrpou bamu da lc murde suti drtwrnge nzabrtzlvz-krmu ninge, da kc tqwai nzpi-krdr ninge. Murde nzmz leplz nzabrtzlvz-zvzlr ninge mz nike pibo badr, trtakitrdeu nzngini-krnge kxnzawz ne Kraes. A' da kx myapxbz kx Gct na-abrtzlvzle ninge.

Nrpakxmrlz Kc Tqyapwxtipx Pol Ngı Da Angidr Murde Vzpxm Mz Kraes

✧ **1:8-9** Aposol 13:2; 13:13—14:20

¹¹ Mzlengeng x inwengeng, Nrpakxmrlz kc tqyapwxtipxbo trvzpxpuu mz leplz. ¹² X trxlrttr-kzpwu'u mz leplz. A' Jiszs Kxnmcpz nide esz'-krde kx rpim bange, mz nzadcpz-lzbq-krmle bange.

¹³ Krlzpeamu nqmz krnge mzli kc. Murde vz-nqblq-angidrx lou x nqmz krgr amrlx. X lolvz-kzx leplz neng Kraes, mz nzadwatr-krngeleng mz presin, murde ma tzlmgitilr nide. ¹⁴ X myaszpxx nrpr kztengeng mz nzpqz-krmle mz nabzge nzalvztrkr melrmqgrng.

¹⁵⁻¹⁶ A' trkrlzwxu kx mcpz pnz Gct ninge mzli kc mzke' trnmcka-ngrde, mz nzngini-krnge aposol nede murde napipxbo Nrpa ngr Jiszs mz krkcng trngiulrJiu. A' mcpzle ninge mz nzvz-nqblq-krde zmrlz ngrde kxmyalz, kxmule-esz' trtakitrpw'u nzwzngz lc. Zbz kx krlzpebzle mzli kc tqmcpz pnz Gct, sc tqvz-ngrbo Damaskzs. X sc tqaelwapxpe-ngrmle bange kx Jiszs Kxnmcpz ngi mrlxde. A' trpnzngz ncblo kx vz-nebax kx na-alvztrle ninge mz nzrkrlzngz Kraes. ☆

¹⁷ X trvz-kzwxu Jerusalem murde krkcng tznigini-kaipr aposol bange na-alvztrlr ninge. A' mz nibr nzrkqlengz ninge, vzx mz Arabia provins. X mz nibr kzdung mzli, sc tqyzlupe-moux mz taon kc Damaskzs. ¹⁸ Zbz yiz tq kaputxpx, mz nibr nzrlmgiti-krnge, sc tqvzpez Jerusalem, mz nzryapwx-krgr mz Pita. Mnctikr bade zbq nzpnu-nrade-nzlvqn. ¹⁹ Mzli lcde, oklati-kzx aposol Jemes, mzle Kxetu rgu, kc tqaclvele dzbe lrmakxtr kc mrkc. A' tr-rmctiwxu kzdq kz aposol.

²⁰ Esalz x mz mz Gct, kx da amrlx kx yrbo bamu da angidr. ²¹ Mz nibrde, sc tqyapwxtipxx Nrpakxmrlz mz provins kcng Siriz x Silisia, mrlcdeng trnzqqlu-ngru lr Jiu. ²² A' leplz neng Kraes kx nzmncng Judiz Provins, trnzkrllzkalr ninge, murde tr-rmcti-lzbqkabr badr. ²³ A' nzxlr-ngrdr nrpa, kx ncblo kc tqatrkatile kxnxrlxngiting mzli kc, mzli ka sa tqryapwpxpe kz Nrpa ngr Jiszs. ²⁴ X nzglqpxlr Gct kc tqtekqtrle ninge.

2

Kxnzaclvelr Dzbe Lrmakxtr Kcng Jerusalem Drtwrdr Esz'ti Kx Nzalvztrkr Pol Tubq

¹ Yiz nzpnu-esz'-nrade-pwx (14) vzt x, mz nibr nzoklatingr ayrnrngr lc, vz-moux Jerusalem. X mzli lc vzkr badr Banabas x Taetus. ² Vz-ngrgr Jerusalem murde opx angidr nzrpi-krm Gct bange navzx. X kx kaputrpebo kc, yrlwr-lxblrkrng badr aposol kc-kzng, x kxnzaclvelr dzbe lrmakxtr kc-kzng Jerusalem. X yokaetipx-angidrbo badr Nrpakxmrlz kc tqyapwxtipxbo mz kxtrngiulrJiu. Murde sutitx drtwrnge kx drtwrgr naesz'ti badr mz nzalvztr-krngeng. X murde ma tzatrkatilr leplz nzwz-krnge kalr, mz nzpi-krdr kx drtwr kxnzaclve kcng Jerusalem tresz'tiu mz nzalvztr-krngeng. ³⁻⁶ Murde kzdung ncblo kcng tzrpilr kx nzlxngitilr Jiszs, a' nzpokia-ngrdr da lc, nzalvztr-rbr-ngrdr kx ncblo napakrng mz nzvz-nqblq-krde Lou sc Mosis, murde narlapxng. Ncblo lcng nzkrllzlr kx drtqgr opx mz Mevalu Jiszs. A' suti drtwrdr kx namnciz-mopwzku mz

Lou sc Mosis. X nzaprtr-lzbqbnzng mz kxnzr-lxngiting, murde natekqtrlr nzalvztrngr angidr. A' plzpxkr Nrpa angidr ngr Kraes, murde ma tzatrkatilrle. Tu-amqngikr mz nzalvztr-krgr lcng, murde nakrlzamu lrpzki angidr ngr nzrlapxngr, x narmu ma tqngqngutrpz mz nzalvztr-rbrngr. Aelwa-ngrbzkr mz ncblo kcng amrlx tzacvelr leplz neng Kraes, kx nzalvztr-krgr ngi da angidr. X kxmule-esz' mz drtwr leplz kxnzkqlung, kxn-zacve lcng nzmyaszpxlr ninge, a' trkxu mz drtqnge nike aotingr drtwr leplz nidr. Murde Gct trkx-kzu mz drtqde nike aotingr drtwr leplz nidr. A' da kx myapx-zlwzbz kx nzalvztr-krdr ngi da angidr o trtingr. Aelwa-ngrbzkr badr kx nzalvztr-krgrng ngi da angidr, x nzaolv-zlr nzalvztrngr lcng amrlx, x trpnzngr da kx natekqtrx elr. Murde kxmule-esz' Taetus tqngi lr Grik x trngiulrJiu, a' kxnzacve kcng Jerusalem, trnzrtulrtr-ngrdru nzrpakngr nide mz nzaxvctr-krbzle mz Kraes, murde narlapx. ⁷⁻⁹ Krlzamu kx leplz ne Kraes kcng Jerusalem, nzrpilr kx Jemes, Pita x Jon nzacvelr nidr. X mzli kc ncblo lcng nztqng tzxlr-ngrdr nzwz-krnge, nzmclr kx Gct aelwapx-ngrde zmrlz ngrde x nzxplr-krde mz nzryapwpxp-krbo mz leplz kxtrngiulrJiu. X nzkr-lzlr kx krlc nqm qcpwz tqaelwapx-ngrde mz nzryapwpxp-krbz Pita mz lr Jiu. Mz nzmukrde lcde, opx-angidrdbz badr kx Gct mcpyle ninge mz nzyapwxtipx-krbo Nrpakxmrlz mz leplz kcng trngiulrJiu, da kc tqwai mz nzmcpk-krbzle Pita nzryapwpxp-krbzle Nrpakxmrlz mz lr Jiu. Zbz aposol lcng nztqng malekr mqgr badr x Banabas, nangi rkx kx nigr kzte-lzbqgr mz nzwzkr Kraes.

X drtwrgr esz'ti kx nigr ncd̄r Banabas nawzkr mz
mzlir krkcng trngiulrJiu, x nawztrpzng mz lr Jiu.
¹⁰ Da kx nzrlxtitxplr bagr kx na-alekr, nzkangr
trau murde naxpengr dakxnzng nangingan leplz
ne Kraes kx trnzrngiscung, da kc tqwai nznzkr
drtwrnge le mzli kc.

*Pol Rpwa'-ngrbzle Mz Pita Nqmq Krde Kx
Trtubqu*

¹¹⁻¹³ Nzalvztrngr lc, kx navz-nqblqku Lou sc
Mosis mz nzrlapxnḡr, vzd̄z-kaip mzli kx Pita
oklati-ngrde leplz neng Kraes mz taon Adiok.
Murde mzli kx vz-ayrnr-ngrde mrkc, prtrpz mz
leplz neng Kraes kxtrngiulrJiu, x nzmung badr,
kxmule-esz' mz nzvz-nqblq-krde Lou sc Mo-
sis batrpzle trnztakitr-krdeu nide mz nzprtrngr
mz nzangiongr. A' mz nibrde, kzdung lr Jiu
nzrlaszmlr Jemes mrkc Jerusalem, x kzdung
nidr nzprtrng mz dzbede kc tzrtulrtr-ngrdr nzt-
pakrngr. Zbz Pita vecpx-lzbq̄bz mz krkcng
trngiulrJiu, murde mwxlrtile nztprikitikr dzbede
lc. Zbz lr Jiu kxznzrlxngiting kcng amrlx tzmncng
Adiok nzvz-nqblq-kzlr nqmq kr Pita, x tzvecpx-
lzbq̄pe-kzng mz krkcng trngiulrJiu. Mz nzm-
krde lc, Banabas nzaprctipe-kzlr nzvz-nqblq̄ngr
nidr mz nzngini-krdr leplz kx trnzvz-nqblq̄-
angidrlru da kxtubq. *

¹⁴ Zbz nzymne-krnge xplrtxbz mz Pita, mz
mz lr Jiu kc-kzng. Murde opx angidr kx nqmq
krde vz-rbr, x trvz-nqblq̄peleu Nrpa angidr ngr

* **2:11-13** Dzbede kc tzpakrng nzl̄xngitilr Jiszs nide Kxnmcp̄x.
A' mz drtwrd̄r, lrmakxtr amrlx napakr-kzng, x navz-nqblq̄-kzlr
Lou sc Mosis, murde narlapxng.

nzrlapxngr. Rpibo bade kx, “Kxmule-esz' nim kzdq lr Jiu, a' trvz-nqblqpewq da amrlx kc tqyclzm mz Lou sc Mosis. ?E memule tqrtulrtr-ngrbzme lrmakxtr lcng trngiulrJiu nzvz-nqblq-krdr Lou kcng? ¹⁵ Blepzbzku mz ncblo ngr alwx kcng trnzkrzlru Loukxtr. Murde mzku nzmc nzngini-krgr lr Jiu, x krlztipeku Lou sc Gct mzli boipe. ¹⁶ Kxmule-esz', a' krlz-kzku kx leplz trntubqung mz nzobqkr Gct mz nzvz-nqblqngr Loukxtr lc, a' mz nzrlxngitingr Mevalu Jiszs. Dekc, nigu lr Jiu tqlxngitipe-kzku Mevalu Jiszs, x drtwrgu br kx atubqtipele nigu mz nzobqkr Gct. A' trvz-nqblqpekuu Lou sc Mosis mz nztubq-ngrbz mz nzobq-krde. Trpengr kx narlapx mz nzrvz-nqblqngr Lou lc, murde tratubqleu leplz mz nzobqkr Gct. A' aelwatx-ngrpwzle kx vz-rbrku. ¹⁷ A' kzdung lr Jiu kx suti drtwrdr navz-nqblqku Loukxtr, nzrpilr na-atrkatilr nigu. Mwx narpilr kx nigu kcng tzabrtrpwzlr drtwrdr mz Kraes mz nzatubq-krbzle nigu mz nzobqkr Gct, sa tqalebeku alwx. X opxm kx Kraes mailzle nigu mz da kx vz-rbr. A' trtingr! ¹⁸ Murde lxngitipex Kraes mz nztubq-krnge. X nzmu narpix na-atubq-lzbqbo mz nzobqkr Gct mz nzrvz-nqblqngr Lou sc Mosis, vz-nqblq-moux lrpzki kc pnz tqpxtxpxpe-ngrne. X mz nzale-krnge da lc vz-rbr-angidrx. ¹⁹⁻²⁰ Murde mz nzaxvctr-lzbq-krbo mz Kraes, axvctr-lzbq-kzx mz nzbz-krde mz kros. X trmnclzpepwc'u mz Lou, murde trpnzngr da kx na-aletprz Lou kc mz krkcng tzbzpeng. Trvz-nqblqpewxu Lou sc Gct mz nzrlapxngr. X trvz-nqblqpewxu nqm q ngr alwx. A' vz-nqblqx Kraes kc tqlupxm bange,

tqkamle bange nzlungr kxmrna. X mz nzlungr kxmrna lc, sc tqvz zvz nzabrtr-krbo drtwrnge mz Mrlx Gct, kc tqaodule ninge x tqbz-ngrde nzarlax-krde ninge. ²¹ Lolvz-amqngix mz nivz lr Gct x zmrlz ngrde kxmyalz mz nike alepem Kraes bange. Murde nzmu nayzlu-mopwc mz nzalvztr-krnge kx navz-nqblqku Lou sc Mosis mz nzrlapxngr, drtwr ngrde kx nzbzkr Kraes ngi brmrda.”

3

*Twzku Nzlungr Angidr Mz Nzabrtr-krbzk
Drtwrgu Mz Kraes,
Trngiu Mz Lou Sc Mosis*

¹ Nimu lr Galesia, lukurnr-ngnamu! X opxm kx kzdq ncblo rwitipele nimu leu. ?Nike tqlxngiti-ngnamu nzpokiangr lc? Murde alvztr-zpwxkr nimu mz nzrtqlvztrngr Jiszs Kxnmcpx mz kros x nzbz-krde mz nzarlax-krde nigu. ² Nadctipx drtwrmu kx Gct kabzle Mqngrkxtr bamu mz nzlxngiti-krmu Nrpa ngr Kraes kc tqyapwxtipxkr. A' trtwztx-pnzwamuu mz nzvz-nqblq-krmu Lou sc Mosis! ³ ?A' nike tqngqngutx-zlwz-ngnamu mz nzrlxngitingr lc tqpokiangr? Murde abzoamu nzlu-krmu kxmrna mzli kc tqtwz-ngnamu Mqngrkxtr tqokatrle nimu. ?A' mzli ka, rpiamu navz-nqblqamu Gct mz nzxplr-krmu esz'-krmu? Nakrlzamu kx nzmu trngida-pnzu! ⁴ Tu-amqngiamu mz nzrlxngiti-krmu mzli kc, kxmule-esz' nzaetqbz drtqmu. A' mzli ka,

opxm kx da kxmrlzting kx navzpxmqng mz nztu-amqngi-krmu lc sa nayrkrpxbz mz nzlxngiti-rbr-krmu lc. ⁵ Mzli kc tqmnc-ngrgu, Gct kabzle Mqn-grkxtr bamu, x alele da kxmatqng mz mzlirmu. ?Memule, alele da lcng murde vz-nqblqamu Lou sc Mosis o murde lxngitiamu Nrpakxmrlz?

⁶ Na-adcp-x-mopwc' bamu Nzryrngrkxtr kc tqr-pile kx, *"Ebraam tubqbz mz nzobqkr Gct murde brti drtwrde nide."* ✧ ⁷ Nayrplatitr narmu kx krkcng tzrlxngiting da kx esalz-ngrbz Gct, da kc tqwai Ebraam, nidr txpwz leplz neng Gct. ⁸ Mz Nzryrngrkxtr, Gct aopx-pnzle kx sa na-atubqtile kxtrngiulrjiu amrlx mz nrlc mz doa kx vzpxm mz nqvi lr Ebraam, krlc Kraes. Murde rpibz Gct mz Ebraam kx, *"Mz nqvi lrm, sa na-amrlzx neidu amrlx mz nrlc ka."* ✧ ⁹ Mz nzmu-krde lc, leplz amrlx kcng tzrlxngiting da kx esalz-ngrbz Gct, da kc tqwai Ebraam, sa nartwzng da kcng tqmrlzting tqesalz-ngrbz Gct bade.

¹⁰ X Nzryrngrkxtr alvztr-kz-ngarde kx leplz amrlx kcng tztuong mz nzvz-nqblqngr Lou sc Mosis, nzmncilzbzng mz nzayrplapxkr Gct, x sa navzng mz Hxl. Murde rpile kx, *"Gct sa na-ayrplapxle doa kx trangidaleu da amrlx kx yc mz Lou scde."* ✧ ¹¹ Trpnzngr kx rkrlz nzatubqti-lzbqngr mz nzobqkr Gct mz nrvz-nqblqngr Loukxtr. Murde Nzryrngrkxtr rpi-kzle kx, *"Nzlukr kxnztubqng"*

✧ 3:6 Nou 15:6 ✧ 3:8 Nou 12:3; 18:18; 22:18 ✧ 3:10 Lou Kcpwz 27:26

tutr mz nzbrtikr drtwrdr Gct.” ☆ *

¹² Doa kx vz-nqblqle Lou sc Gct, pxtxpx-ngrde nzesalz-krde. Murde Nzryrngrkxtr alvztr-kz-ngrde kx, “*Doa kx twzle Lou kcng, navz-nqblq-angidrle natqdeng amrlx, x bzq tao pnz mz alwx.*” ☆ ¹³ A' nigu amrlx taoku mz alwx x mnclzbzku mz nzayrplapxngr kc tqvzpxm mz Lou sc Gct. Mz nzmukrde lc, Kraes arlapxle nigu mz nzayrplapxngr lc. Murde mzli kc tqbzongrmle mz kros, tekqtrle nigu mz nzayrplapxngr. Krlzku kx Gct ayrplapx-zpwxle nide, murde Nzryrngrkxtr rpile kx, “*Mrlx kx nzado mz nounc, bz-ngrde nzayrplapxkr Gct.*” ☆ ¹⁴ Mevalu Jiszs arlapxle nigu, murde nzlungr kxboi Heven kc tqkabz Gct mz Ebraam, naka-kzpzle mz leplz amrlx kcng tzlxngitilr Jiszs, kxmule-esz' nidr lr Jiu o trngiulrJiu. Bz-ngrde nigu, murde natwzku Mqngrkxtr kc tqesalz-ngrbz Gct mz krkcng tzlxngitilr da kx esalz-ngrdeng.

Lou Sc Mosis Trayrkrpxleu Da Kc Tqesalz-kaingr Gct

¹⁵ Mzlengeng x inwengeng, napibo dq nzymne-ebzpxngr. Mzli kx kzdq ncblo yro-ngrde drtq doa kx natwzle drtc' nyzde x dztudeng mz nibr nzbz-krde, trpnzngr kx krlzle

☆ **3:11** Habakuk 2:4; Rom 1:17; Hibru 10:38 * **3:11** 3:9
 Krlcde seleng—nztubqngr mz nzobqkr Gct, x nzlu-alongr mrkc Heven. 3:10 Kxmule-esz' aleq alwx esz'txu, xpqbrlr-ngrn Loukxtr, x amnclzbzle nim mz nzayrplapxkr Gct. 3:11 Natq Gct lc drtwr ngrde li. Leplz neng Gct sa namnc-zpwxng mz nrlc ka mzli kx nzlu-krdr vz-nqblq-ngrde nzbrtikr drtwrdr nide. X nzlungr kxboi Heven vzpxm mz nzabrtr-krbzlr drtwrdr mz Jiszs. ☆ **3:12**
 Livae 18:5 ☆ **3:13** Lou Kcpwz 21:23

nzteqtr-krde nike yrole. Mz nqmq lcpwz, trpnzngr kx krlzle nzteqtrngr da kx esalz-ngrbz Gct mz Ebraam. ¹⁶ Gct esalz-ngrbzle da lc mz Ebraam x mz doa nede. Tresalz-ngrpwzleu mz doa nedeng, kcng tzngi lr Israel. A' mz Nzryrngrkxtr rpibz Gct mz Ebraam kx, “Mz *doa nem*.” Ycmnetile doa esz'txu, kc tqngi Jiszs Kxnzmcp. ☆ ¹⁷ Gct esalz-kai-ngrbzle da mz Ebraam, x mz nibr yiz trtqki-pwx-nzpnu-tq (430) sc tqka-atebzle Lou kc mz Mosis, nangi scdr lr Israel. Mz nzmu-krde lcde, rblx nzkapx-krde Nzesz'tikr Drtwr Gct ncdz Ebraam x Kraes, doa nede. Nzesalz-krde krali tratkatileu krkc kai. ¹⁸ Ka-nrbalq Gct da kxmrlzting amrlx kcng tqesalz-ngrbzle mz Ebraam x Kraes. X natwz-kzku da lcng, mz nzaxvctr-krbzku mz Kraes. A' nzmu navz-nqblqku Lou sc Gct mz nzrtwzngr da lcng, e trngipeu da kx nzka-nrbalq. A' Gct ka-nrbalq-zpwxzbzle da lcng mz Ebraam, da kc tqwai nzesalz-krdele. ¹⁹ ?E mz nibrde, nike Gct tqka-ngrbzle Loukxtr mz Mosis, nangi sc lr Israel? Gct pibzle mz enjrl nedeng, nakabzlr Lou badr. Suti drtwrde nzaelwapx-krde kxnamu nzmnc-zpwx-krdr badr kxmule-esz' nzaleng alwx, nakrlzbzle mzli kc navz-ngrm Kraes. † ²⁰ Loukxtr ngi Nzesz'tikr Drtwr Gct badr leplz nedeng. Mosis nide kc tqtu mz mzlr Gct x leplz nedeng. X leplz mz nrlarde lcng li natutrlr natqdr, murde kzdung da kc tqesalz-

☆ **3:16** Nou 12:7; 13:15; 24:7 † **3:19** Mz nzvz-krmle, Kraes sc tqtwzpele da kc tqesalz-ngrbz Gct bade nidz mz Ebraam. X leplz amrlx kcng tzaxvctrpzng mz Kraes nztwz-nrbalq-kzlr da lcng.

ngrbz Gct badr mz Nzesz'tikr Drtwrdr lc, nztuong mz nzvz-nqblq-krdr natqde. Dekc, da kxmrlzting kcng tzvzpxmqng mz Lou, tzyctrng mz kxnamu nzalelr me pnz drtwrde. A' da kc tqesalz-ngrbz Gct mz Ebraam, yctxtrpwz mz Gct esz'-krde nzale-krde da kc tqesalz-ngrbzle bade. A' tryctrpwzu mz nike na-ale Ebraam.

²¹ ?Lou kcng tqka Gct, nzrpwa'-ngrbzlr bade nzatutr-krde da kx esalz-ngrbzle? Trtingr! Murde rblxbz mz lou nzatubqtingr kxnzaleng alwx. X trpnzngr lou kx kabzle nzlungr kxboi.

²² Murde Nzryrngrkxtr amnclzbzle leplz amrlx mz zmatq ngrde vzpxm mz nztao-krdr mz alwx. X trpnzngr leplz kx krlzle nzarlapx-lzbq-krde. takitrde nzrtwzngr nzlungr kxboi mz da kx alele. A' esalz-ngrbz Gct nzlungr kxboi mz doa amrlx kx nzabrtrpzlr drtwrdr mz Jiszs Kxnmcpix nzarlapx-krde nidr.

²³ X mzli kc trlxngitikakr Kraes, nigr lr Jiu mnclzbzkr mz mz nzapu-krgr kxnmncng mz presin. Murde mzli kc navzm Kraes naoliqtikr nzlngiti-krgr nide. ²⁴ X Loukxtr apule kxakrlz. Murde kam Gct Loukxtr bagr, mz nzmailz-krbzle nigr mz Kraes, murde natubqkr mz nzobqkr God mz nzbrtikr drtwrgr nide. †

²⁵ A' mzli ka, mz nzlngiti-krgr Kraes, trmn-clzpepwzkru mz zmatq ngr Lou sc Mosis.

Kxnzrlxngiting Nzapulr Doa Kxnztopwzng Ne Gct, Mz Nzaxvctr-krbzlr Mz Mrlxde

† **3:24** Loukxtr aelwapx-ngrmle bagu alwx ngrgung. X sa na-ayrplapx Gct kxnzaleng alwx mz Hxl. Dekc tqsutu drtwrgu Mevalu kx na-arlapxle nigu.

²⁶ Mzli ka kxmule-esz' trnginipuu lr Jiu, a' nimu kz doa kxnztopwzng ne Gct, murde lxngitiamu Mevalu Jiszs nzarlapx-krde nimu. ²⁷ Nzaxvctrpebzmu mz Kraes, mzli kc tqrlxngiti-ngrnamu x tqwrkxtr-ngrnamu. X mzli ka mz nzaxvctr-krbzmu lc bade, sa tqapupeamu nide mz nqmq krdeng amrlx. ²⁸ Trpnzngr doa kx myaszlzle kztedeng mz drtwr Gct kxmule-esz' nide lr Jiu o kxtrngiulrJiu, nide kxnzawz-nrbalq o ncblo kxetu, x kx ngi ncblo o olvz, murde nigu amrlx ngrgu nzprtrku mz dzbede kxes' mz nzlxngiti-krgr Kraes. ²⁹ X mz nzesz'ti-krgr mz Kraes, twzku da kcng tqmrlzting, tqesalz-ngrbz Gct mz Ebraam, x mz Kraes, doa lc tqvzpxm mz nqvi lrde.

4

Nzmnclz-ngrbz Mz Lou Apule Nznginingr Kxnzawz-nrbalq

¹⁻² Mzli kc nigr lr Jiu tqmnclz-ngrbzkr mz Lou sc Mosis, apukr doa kxnztopwzng. Kxmule-esz' dztu trte sa nangi dztu doa kxtpwz nede kalr, a' mzli la tqnginibe-ngrde doa kxtpwz, apule kxnzawz-nrbalq. Trpnzngr scde zmatq kx na-acle-lzbq-ngrde. A' navz-nqblqle natq trtede badr kxnzaclvelr nide, nakrlzbzle mzli kc tqpnz drtwr trtede nzka-krbzle kzdung da bade, kx nzetupe-krde. ³ Kxmu-kzpwzle la mz nigr lr Jiu. Mzli lc tqapu-ngrgr doa kxnztopwzlbzng mz nzmailzkr Loukxtr. X apu-kzkr kxnzawz-nrbalqng murde yrplatitxtrpwz nargr kx navz-nqblqkr lou lcng amrlx. ⁴ A' kx krlzbzle mzli

kc tqyrlq Gct, atwzlr-ngrmle mrlxde, mzte nzmc nznngini-krde ncblo txne, kx ngi lr Jiu, kc tqm-nclzbz mz Loukxtr. ⁵ Vzm mz nzarlapx-krde nigr lr Jiu, murde nangingr doa neng Gct, kcng natwzkr da amrlx kx rngisc Kraes, mz nzaxvctr-krbzk bade. ⁶ X mzli ka nipe-kzmu doa neng Gct. X Mqngr Mrlxde kc tqmncpxm mz nabzgu, okatrle nigu nzkriz-krgru kx takitrde doa kxes' mz nigu nizrpi-krde kx, 'Gct ngi Trtenge!' ⁷ Dekc trnipeguu kxnzawz-nrbalqng, a' nipegu doa neng Gct kcng natwzlr da kxmrlzting amrlx tqesalz-ngrbzle bagu.

Doa Kx Brti Drtwrde Nzrvz-nqblqngr Nqmq Kr Lepz Mz Nzrlapxngr; Sa Navz Mz Hxl

⁸ Mzli kc nimu kxtrngiulrJiu trkrlzwamuu Gct angidr kc esz'txu, murde trxlrkalamu Nrpakxm-rlz. Mzli lcde mnclzbzmu mz zmatq ngr drka' mz nzangio-krmu nidr x nzwztr-krbzmu badr. ⁹ A' mzli ka, krlzpeamu Gct, x rpile kx nimu doa nedeng. ?Memule tqyzlu-mou-ngrnamu mz nzwztr-krbzmu mz drka' lcdeng tzatrkating, kx trpnzngr scdr zmatq mz nzarlapx-krdr nimu? ¹⁰ Prtrpzmu mz nqmq kr lr Jiu, x mz nzakaputr-krmamu zbq, temz, yiz, x nrpr kxtr nyzdrng. ¹¹ A' mwxlrlyzx nimu mz nzpctxpx-krmu Kxnzmcpx, murde nzwz-krngeng amrlx trpengr da kx nabx-trlr. ^{12a} Yrnitirpo bamu. Vz-nqblqamu nqmq nr drtwrge mzli ka mz nzalvztr-krnge lc, murde mz nivz kxetu, sc tqvz-nqblqpex nqmq krmu mzli kc tqmnc-nrgu. A' trvz-nqblqwxu nqmq krgng.

*Pol Ycmnetr-ngrde Nivz Lrde X Nzotrkr
Drtwrde Lr Galesia*

^{12b} Mzlangeng x inwengeng, trpnzngr da kx-trka kx alemamu bange mzli kc. ¹³ A' krlzamu kx mzli kc ayrnrngr tqryapwpxp-ngrbo Nrpakxmrlz bamu, yangrngatipex nzvzngr. ¹⁴ Kxmule-esz' wz-zlwzamu mz nzacive-krmu ninge, a' trbqs-zou drtwrmu ninge. A' suti drtwrmu namncku, mz nzapusr-knamu ninge enjrl kx avzom Gct, o Mevalu Jiszs esz'-krde. ¹⁵ Abrtzlvzamu ninge mzli lc tqryapwpxp-ngrbo Nrpakxmrlz. ? Memule tqblepxpe-ngrnamu mzli ka? Murde vqti drtqmu nzokatr-krmu ninge mzli lc. ¹⁶ ? A' mzli ka, nike tqapusr-ngrnamu ninge enqmirmu? ?Murde pi-mopo bamu lrpzki angidr ngrnzrlapxngr?

¹⁷ Leplz kcng tzsuti drtwrdr nzvz-nqblq-krmu Lou sc Mosis, nztamiti-zlwzlr nimu mz nzprtrkrbzmuzmz nqmqrdr. A' trngiu dalr nzokatrngr nimu. A' nakapxmlr nimu bagr, murde namnclzbzmubadr. ¹⁸ Nangi da kxbrngz nzsutikr drtwrdr nzngini-krmu kxnzvvz-nqblqlr nidr, nzmu nzalvztr-ngrbzlr bamu da angidr. Murde mrlz nzvz-nqblq-krmu da angidr, a' bzkkq ngitxpwwz mzli kx mnc-ngrbo bamu. ¹⁹ Doa nengeng, apux lxemu, murde drtwrnge yckq krlzbzle mzli kx mzpu nzmc-ngrdr, x opx angidr kx nzmnc-krmu lc mrlz, x navz-nqblq-zpwxamu Kraes mz nzapu-krmu nide. ²⁰ Rblxm bange nzkrlzngr nike nayrx mz nzlxngiti-krmule. X sutitx drtwrnge kx namnc-txpwwzku elx mrla mzli ka, murde naycmne-nrwxbo bamu.

Gct Sa Napxtxpx-ngrde Leplz Kcng Tzmn-clzbzng Mz Lou Sc Mosis

²¹ Nimu lr Galesia kcng tzsuti drtwrdr nzl-lapxngr mz nzmnczlz-krbzmu mz Lou sc Mosis, trkrlzwamuu nike tqalvztr Lou lang. ²² Murde nzyr elr kx Ebraam mrlxde nzling. Kc ayrrngr drtqde Ismael, yrlopxbz Haga, olvz kxnzawz-nrbalq ne olvz rde, Sera. Krali drtqde Aesak, yrlopxbz Sera, olvz ngr Ebraam, kx trngiu kxnzawz-nrbalq, a' drtqde opx. ²³ Gct esalz-ngrbzle mz Ebraam kx nede dq doa ncblo. Zbz mrlx Haga mzte nzmc, murde Ebraam rpile na-angidale natq lc mz nide esz'-krde. A' mrlx Sera mzte nzmc, murde Gct esz'-krde atutrle natqde mz nzrmcngr mz Aesak.

²⁴⁻²⁵ X olvz lcng nzling ngi kz kzdq nzymne-ebzpxngr, murde nztu-ngrdr Nzesz'tikr Drtwr kcng li kx blepx-lxblrngz mz mzlr Gct x leplz nedeng. Haga tu-ngrde Nzesz'tikr Drtwr Kc Kai, tqkabz Gct mz Mosis, mz Newz Saenae mrkc Arabia. X tu-kz-ngrde Jerusalem mz nrlc ka, murde leplz ngrdeng nznginipedr kxnzawz-nrbalqng kcng tzmnczlzbzng mz zmatq ngr Lou.

☆ ²⁶ A' Sera tu-ngrde Nzesz'tikr Drtwr Gct Kc Ate badr leplz kcng tzlxngitilr Kraes. Nzesz'tikr Drtwr lc ngi dalr zmrlz ngrde kxmyalz x da kx esalz-ngrde mz nzavzo-krmle Kraes. Sera tu-kz-ngrde Jerusalem kc navzm, mrkc namncngr leplz neng Kraes amrlx kalr. X ni-kzgu doa neng Sera kcng drtqdr tqopx, x prtrpzku mz nqvi lr Gct, murde brtipe drtwrgu da kx esalz-ngrde. ²⁷ X

☆ **4:24-25** Sam 110; Asaea 9:6

profet Asaea ycmnetr-ngrde Sera mz nzrpi-krde kx, “Olvz kx vz-nrbalq, nim kc trpnzngr nede doa, drtwrm naelalzm! Kabopx mz nzabrtz-krm, nim kc drtqde tretqu mz nzrmcng mz doa! Murde nim kc tr-rngine-pnzu doa mzli kc, sa narnginetim doa kxkqlu namyaszpxle olvz kc tzmncng mz ncblo ngrde.” ☆ *

²⁸ Mzlengeng x inwengeng, apuku Aesak, mrlx Sera, murde prtrku mz nztubqng kx tqvzpxm mz da kx esalzng Gct. ²⁹ Mzli lc pnz Ismael atrkatile Aesak, kc tqbatrpz Mqngrkxtr mzte nzrmcng. X mzli ka krkcng tzmncnclzbzng mz Lou sc Mosis, nzatrkatikzlr nigu kcng tzlxngitilr Kraes mz nzokatrkr Mqngrkxtr. ³⁰ A' mcku mz Nzryrngrkxtr, kx Sera pibzle mz Ebraam kx, “Maszlrpxngr Haga ncd mrlxde. Murde trpnzngr nzprtrkr mrlx olvz kxnzawz-nrbalq lc mz da lcng nakaobz mz mrlx” olvz kx drtqde opx. †

³¹ Mz drtwr lc, nadcpz mz drtwrmu kx trnginiguu doa neng Haga, olvz lc tzawz-nrbalq. A' nigu doa neng Sera, olvz lc drtqde opx, murde Kraes arlapxpele nigu.

5

☆ **4:27** Asaea 54:1 * **4:27** 4:23 Mzli lc pnz, Sera vz-nrbalq. X Ebraam trngztibzle Haga, kc tqmikapele Ismael. Mz nibrde Gct batrpzle Sera nzmika-krde Aesak. 4:27 Pol mcle kx nzqqlukr leplz kxtrngiulrjiu kx nalxngitilr Jiszs kalr, sa namyaszpxlr lr Jiu kcng tzvz-nqblqlr Loukxtr. † **4:30** [Nou 21:10] X Gct pibzle mz Ebraam kx navz-nqblqlr natq Sera. Mz nzmu-krde lcde, leplz kcng tzmncnclzbzng mz Lou trpnzngr nidr nzrlapx-krdr, da kc tzwaibz mz Ismael, murde trpnzngr da sc Ebraam kc tqtwzle.

*Bzqk Lxngitiamu Leplz Kcng Tzsuti Drtwrdr Kx
Namnclzbzmu Mz Lou Mz Nzrlapxngr*

¹ Kraes arlapxle nigu murde drtqgu naopx. X trsutiu drtwrde nzmncly-mou-krbzmu mz Lou sc Mosis. A' natu-amqngiamu mz nzarlapxkr Kraes nimu.

² Murde ninge, Pol, pibo bamu kx nzmu nimu kxtrngiulrJiu rlr-lzbq-ngrbzmu mz nzipakrngr nzrlapxngr nimu, e nzbzkr Kraes mz kros trpnzngr nzarlapx-krde nimu. ³ Aclvetio-angidramu! Murde ncblo kx natubqbz mz nzobqkr Gct mz nzrlr-lzbq-ngrbz mz nzipakrngr, navz-nqblq-kzle Lou sc Mosis amrlx x bzqk tao mz alwx. ⁴ Kxnzvx-nqblqlr Lou mz nzatubqtingr nidr nzpxtpxpe-ngrdr zmrlz ngr Gct kxmyalz. X sc tzlakitpxpebzng mz nqvi lr Kraes. ⁵ A' mz nzokatrkr Mqngrkxtr, sc tqobqtipxku da amrlx kx esalz-ngrbz Gct bagu mz nzatubqtikr Kraes nigu kcng tzbtrtipe drtwrgu nide. ⁶ Murde mz nzaxvctr-krbzku mz Mevalu Jiszs, trpnzngr da kx ablepxle nzmu napakrgu o trtingr. A' da kx myapxbz ngi nzrlxngitingr nide, x nzipvz-nqblqngr nide mz nzmrlzti-krgu leplz.

⁷ Ir Galesia vz-nqblq-angidramu Kraes mzli kc. ?Neke aesakibzle nzvz-nqblq-krmu lrpzki angidr ngr nzarlapxngr? ⁸ Nzrtamitingr la, trvzpxpuu mz Gct kc tqaveatile nimu mz nzngini-krmu doa nedeng. ⁹ Nzalvztrngr kxtrka kxpipzne krlzle nzatrkatikr-krde nzrlxngitikr leplz ne Gct amrlx, da kc tqwai yisti kxpipzne nztalvzpx-krde flawa kx nangi bret, mz nzawzpx-krdele. ¹⁰ A' lxngitix kx Kxetu rgu sa naokatrle nimu murde navz-nqblqamu Nripakxmrlz kc tqalvztrpo bamu mzli

kc. A' Gct sa na-ayrplapxle mrlx kc tqakamrbr-ngrbzle drtwrmu, mz nzalvztrngr lc tqtrka, kxmule-esz' nide neke.

¹¹ ?Mzlengeng x inwengeng, nzmz sa tqalvztr-pex kx ncblo napakr, nike drtwrdr tqngya-ngrmle bange? Nzpxtxpx-ngrdr nzalvztr-krnge kx nzbzkr Kraes mz kros txpwz kx arlapxle nigu, murde rblx nzglqpx-lzbq-krdr mz da lc. ¹² A' sutitx zlwz drtwrnge kx krkcng tzatrkatilr nimu mz rtultr-ngrbzlr bamu nzrpakrngr, navzpx-lzbq-kzng.

Navz-nqblqku Nzycmne-krm Mqngrkxtr Mz Nabzgu

¹³ Mzlengeng x inwengeng, Gct aopxle drtqmu murde naokatramu kztemung mz nivz. A' mz nzprtr-krmu mz nzaopxkr drtqmu lc, bzkq vz-nqblqamu nepunr drtwrmu kx ataole nimu mz alwx kc tq atrkatile leplz. ¹⁴ Murde sa tqangida-peamu Lou kc atwrnrngr mz nzvz-nqblq-krmu natq kc tqrpile kx, “*Mrlzti kztemqng da kc tqwaiq nzmrlzti-lzbq-krm.*” ☆ ¹⁵ A' bzkq atrkatiamu nzmnctr-lxblrkr leplz ne Gct, mz nzngya-etrkr drtwrmu x nzotabl-etr-krnamu.

¹⁶ A' vz-nqblqamu nzycmnekr Mqngrkxtr mz nabzmu, murde mz nzale-krmu da lc, trnavz-nqblqwamuu nepunr drtwr lcng tqtrka. ¹⁷ Nepunr drtwrmu x Mqngrkxtr nzota-etrng x nzota-ebitr-zvzpxmqng bamu, mz nzaprcti-krdr nimu. ¹⁸ A' vz-nqblqamu Mqngrkxtr, murde mz nzale-krmu da lc, trmnclzpepwzmuu mz Lou sc Mosis.

☆ **5:14** Livae 19:18; Matiu 19:19; 22:39; Mak 12:31; Luk 10:27; Rom 13:9; Jemes 2:8

¹⁹ Nepunr drtwrdr kxdrka'ngr mailzle leplz mz
nzale-krdr da kxnmulr lcde seng.

Nzrmwimingr leplz kx trngiu krnalzdr,

trnzlqngi-kru drtwrdr,

nzamqmiti-rbr-krdr mz nrkrdrtdqr,

²⁰ nzangio-krdr da kx trngiu Gct angidr,

nzryzplengz-krdr leplz,

drtwrdr kxmwa,

trnzmnc-nivzlr-krdr,

nzdobukr drtwrdr,

nzyrpupxkr zngya,

nztalwz-krdr,

nzrpwa'-zvz-krdr da,

nzaki-lzbq-krdr,

²¹ nmrkcmnz-krdr,

nzrmnq-zvz-krdr, x

trnzclu-krdr mz da kx myangr drtq.

x da kxnmulr lcng.

Kabo bamu natq kx xplr mzli ka, da kc tqwaile
mzli kc, kx leplz kx nzale-zvzng da lcng tr-
natwzlru da kcng nzvzpxmqng mz Gct, murde
nzpxtpx-ngrdr nzngini-krde King rdr.

²²⁻²³ A' nra Mqngrkxtr mz nabz leplz kcng tzvz-
nqblqlr nide, nidr seleng:

nivz,

nzelalz-krm drtwr,

nzmnczpxwng,

nzaenzli-zpwxng,

nzokatrng,

nzrmrlzng,

nzatukztrng natq,

nzvz-nrwxng, x

nzaclve-lzbqng.

X Lou sc Mosis tr-rpwa'-ngrdeu nzale-krmu da lcng. ²⁴ A' doa neng Mevalu Jiszs nzrtxo-amqngilr nepunr nabzdr kxdrka'ngr. X opxm kx nztqlvztrlrng mz kros. ²⁵ X namnc-nqblq-zvzku natq Mqngrkxtr mz nabzgu, murde nide kc tqalu-mople nigu. ²⁶ A' bzkq glqpx-lzbqku, murde batr-ngrbzkzku nzngyatikr drtwr leplz nigu x nzdobuti-krdr nigu.

6

Naokatrku Kztegung

¹ Mzlengeng x inwengeng, mzli kx kzdq nimu tao-ngrde mz alwx, nimu kcng tzbrng mz nzmnc-nqblq-krmu Mqngrkxtr, naokatramu nide mz nzyzlu-krmle mz Gct. A' mz nzalengr da lc, na-avzo-lzbqamu x navz-nrwxngr, murde ma tqtaoamu mz alwx kcpwz. ² X naokatr-kzamu leplz kx prtilz da kxtrka. Murde sa tqangida-peamu natq Kraes kc tqrpile kx namrlzti-lzbqku. ³ A' doa kc tqrpile kx nide ncblo kxmyalz, a' trngiu da angidr, ncblo la angqnguti-lzbq, x tao mz alwx ngr nzglqpx-lzbqngr. ⁴ Mz drtwr lc, pwxlitipxpwz kx da kc tqaleq brngz o trka, murde na-abrtzlvzq nzale-krm da kxtubq. A' bzkq arsaklr-lzbq-ngnamu ncdzr kztem. ⁵ Murde doa kxes' na-alele nzwzngr kx amnqlzbz Gct bade.

⁶ X takitrde kx nimu kcng tzalvztr mz natq Gct naokatramu ncblo kc tqalvztrle nimu, mz nzkra-krbzmu da x trau bade.

Sa Namcku Nra Nzmnc-krku Kalr

⁷ Bzkq apokiati-lzbqamu. Murde Gct tr-rlrpx-ngrdeu leplz nzxtrnga-krdr nide. A' ayzlu-mopwzle da mz leplz amrlx mz nzvz-nqblq-krde da kx nzpetilr mz nzmnc-krdr mz nrlc ka. Da kc tqwai nzrtwz-krmu mz nrlanc nyzmu da kx petiamu elr. ⁸ Doa kc tqvz-nqblq-zvzle nepunr drtwrde kxdrka'ngr, sa natwzle nzodati-alongr mz Hxl. A' doa kc tqvz-nqblq-zvzle Mqngrkxtr, sa natwzle nzlungr kxboi Heven. ⁹ Bzkq drtqmu sa mz nzalengr da kxmrlz, kxmule-esz' trmckalamu da kx vzpxm elr. Murde sa namcku nra nzwz-krung kalr. ¹⁰ Mz nzm-krde lcde, naokatrku leplz amrlx mzli kx takitrde, myapxbz kztegung kcng tzrlxngiting.

Natq Ngr Nzarl-lzbqngr

¹¹ Mcamu ena nzryr-krnge lcng tqwzpx! Ryrbo bamu mz mqnge, murde naglxamu kx ninge angidr lc tqryrbo bamu. *

¹² Leplz kcng tzrpilr kx napakrmu, nzmwxlrng nzplzpx-krdr Nrpakxmrlz kx nzbzkr Kraes mz kros arlapxle nigu. Murde nzaoti drtwrdr lr Jiu lcng, murde ma tzatrkatilr nidr. ¹³ A' krkcng tzrpakrng trnzlolvz-pnzlru Lou scng Gct amrlx. A' nzsuti drtwrdr nzglqpx-lzbq-ngrbz mz lr Jiu kcng, mz nzvecpx-krdr nimu mz nzrpakngr. ¹⁴ Trtakitrdeu nzglqpx-lzbq-krnge, a' ngi txpwz mz nzbzkr Kxetu rgu Jiszs Kxnmcpix mz kros

* **6:11** Letz lc mzli kc tzyr-ngrde, yr kzdq ncblo x Pol kc tqycmnepwz. Mzli kc tqkrlz-ngrmle ngalrde 11, sc tqyrpe Pol.

mz nzarlapx-krde ninge. Murde prtrx mz nzbz-krde lc. X mzli ka dalr nrhc ka trpengr nztamiti-krdr ninge, x nar leplz mz nrhc ka tryrplatitrlru nqmq ngr drtwrge. ¹⁵ Nzrpakrgr o trnzrpakr-ngru trmyapxpwzu. A' da kx myatxpwpwz ye, nZRka-krbz Gct nzlu-krde bamu mz nzyrlqtr-krbzle Mqngrkxtr mz nabzmu. ¹⁶ Gct sa nayc mz drtwrde leplz amrlx kcng tzvz-nqblqlr nzalvztr-krge lcng, mz nZRka-krbzle nzmnc-zpwx-krdr badr. Murde mz nzngini-krdr leplz neng Gct, nidr lr Israel angidr.

¹⁷ Abzo mzli ka, bzkq rpianu kx nzalvztr-krge vz-rbr. Murde opx angidr kx wztr-zpwxbo mz Kxetu Jiszs, murde nrkrdrtnge tulvzpe bzmr nZrvaebrkr leplz ninge x nzrikla-krdr ninge. ¹⁸ Mzlengeng x inwengeng, krka'-ngrne kx Kxetu rgu Jiszs Kxnmcpw, nakabzle bamu zmrlz ngrde kxmyalz mz nabzmu. Eu, angida.

Delape. Ninge *Pol*.

Nzryrngkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 11 Nov 2022 from source files dated 30 Nov 2021

fb2b7f06-e254-5fb7-b59d-ee21d5d7a93f